

13 APR 2001

MAHATHIR MELAKUKAN LAWATAN SEHARI KE SELANGOR

KUALA LUMPUR, 13 April (Bernama) -- Perdana Menteri Datuk Seri Dr Mahathir Mohamad memulakan lawatan kerja seharinya ke negeri Selangor hari ini dengan mengadakan perjumpaan tertutup dengan perwakilan Umno Bahagian Gombak dan Hulu Langat.

Majlis yang diadakan di Dewan Orang Ramai AU2, Taman Sri Keramat itu turut dihadiri oleh Pengerusi Badan Perhubungan Umno Negeri Tan Sri Muhammad Muhammad Taib dan Timbalan Pengerusi Datuk Seri Mohd Khir Toyo yang juga Menteri Besar Selangor.

Dr Mahathir yang juga Presiden Umno kemudiannya bersama-sama anggota perwakilan dan penyokong parti itu menghadiri majlis jamuan tengah hari dalam khemah khas dekat dewan tersebut.

Petang ini, Dr Mahathir akan ke Kuala Selangor dan mengadakan perjumpaan dengan Umno Bahagian Kuala Selangor dan Bahagian Selayang di Bangunan Umno, Kuala Selangor.

Baru-baru ini Dr Mahathir melakukan lawatan serupa ke Kelantan, Perak dan Negeri Sembilan.

-- BERNAMA
MAM ZS NMO